



**Qimussertarneq qimussillu piujuartinnissaat qulakkeerniarlugu, Naalakkersuisut ukiuunerani
tuttuttassanit qimussimik tuttunniartartunut immikkut immikkoortitseqqullugit peqquneqarnissaannik
Inatsisartut aalajangiiffigisassaattut siunnersuut.**

(Inatsisartunut ilaasortaq Doris J. Jensen, Siumut)

(Siullermeerneqarnera)

Inatsisartunut ilaasortamut Doris J. Jensen siunnersuummut qujanaq.

Demokraatinut pingaartuuvoq, ilitsoqqussatta illersornissaat. Siulitta qimusserneq pinngitsoorsinnaasimangilaat ilaquuttamik pilersorlugillu inuutinnissaannut. Tamanna Demokraatini ataqqisorujussuarput, uagutsinnullu pingaartuuvoq, ilitsoqqussat taakku piginnarnissaat.

Tassunga atatillugu nassuerutigissavarput, nunarsuaq teknologilu sukkasoorujussuarmik ineriartorsimmamata. Tassanilu aamma piniariaatsit eqqaassagutsigit taamaappoq. Uagut nammineq aalajangissavarput, qanoq annertutigisumik ilitsoqqussatta piniariaatsit piginnarnissaat. Demokraatinut oqimaaqatigiisitsinerup naninissaa apeqqutaavoraasit. Piffissaq utertissanngilarput ineriartorneq puiguvisorlugu, taamatulli pingaartuuvoq, annerusumik minnerusumilluunniit qulakkiissallugu, ilitsoqqussat qangarnisat piginnarnissaat.

Una siunnersuut nutaaliat qangarnitsallu akornaniippoq. Naatsumik oqaatigalugu isumassarsiatsialaavoq ukiuunerani tuttuttassat ilaannit immikkoortitsinissaq imaasillugu, tuttuttassat taakku qimussimik tuttunniartartunit pisisinnaangorlugit.

Tassunga atatillugu Demokraatit isumaqarput, eqqarsaasersuutaasariaqartoq nunatta nittarsaanneranut ilanngullugu soorlu assersuutigalugu assinik videolianillu pilersitsinikkut, taakku nunatsinni inooriaasitoqqap pitsaasumik oqaluttuarineqarneranut tunngavuisinnaammata.

Siunnersuut akuerineqassasoq innersuussutigineqarpoq Aalisarnermut, Piniarnermut, Nunalerinermullu ataatsimiititaliami suliareqqitassanngorlugu.